

**PRU-13 Mungkin Diadakan Pada April**  
**mStarOnline**  
**Februari 20, 2013**  
**Oleh WONG SAI WAN**

**KUALA LUMPUR:** Parlimen mesti dibubarkan pada minggu ini sekiranya Pilihan Raya Umum Ke-13 (PRU-13) diadakan pada Mac depan.

Sumber berkata, PRU-13 mungkin diadakan pada bulan April walaupun Perdana Menteri, Datuk Seri Najib Tun Razak amat gigih untuk memastikan segalanya diselesaikan pada hujung Mac.

Sumber ahli parti berkata, tiga perkara penting yang sedang dilaksanakan dan memerlukan masa seminggu atau dua minggu untuk diselesaikan sebelum Najib boleh bertemu dengan Yang di-Pertuan Agong bagi mendapat perkenan untuk membubarkan Parlimen.

Beliau mengenal pasti tiga perkara yang belum selesai seperti manifesto Barisan Nasional (BN), senarai calon dan persiapan menyeluruh parti itu.

Difahamkan terdapat beberapa manifesto BN pada pilihan raya kali ini iaitu yang utama bagi negara, satu untuk wanita dan lain-lain untuk golongan muda.

Beberapa negeri penting yang cuba dirampas semula oleh BN turut mempunyai kertas kerja tersendiri yang masih menunggu kelulusan dari Najib.

Bagi senarai calon, Najib menghadapi kesukaran untuk melantik calon Menteri Besar untuk Kedah dan Selangor yang cuba dirampas semula BN.

"Tanpa nama calon MB yang dicadangkan sebelum pilihan raya, Najib akan berdepan kesukaran untuk meyakinkan pengundi bahawa BN serius untuk menawan kembali negeri itu," kata sumber lagi.

Ibu Pejabat BN hanya mula mengedarkan sepanduk, bunting, beberapa komputer dan peralatan sokongan lain pada minggu ini dan ia mengambil masa selama seminggu untuk diserahkan ke peringkat akar umbi.

Dua hari lalu, Najib berada di Singapura untuk menarik minat pelabur utama ke Johor.

Beliau akan berlepas ke Sarawak pada Rabu hingga Jumaat ini.

Pada Sabtu, beliau akan berada di Kuala Terengganu sebelum berkunjung ke Kuala Pilah, Negeri Sembilan keesokan harinya.

Najib dijadualkan bertemu rakan sejawatannya, Perdana Menteri Thailand, Yingluck Shinawatra di Putrajaya untuk membincangkan mengenai rancangan persempadanan bersama pada 28 Februari ini.

Ini bermaksud ia merupakan tempoh terakhir untuk Najib mengkaji semula isu penting iaitu pada minggu depan, menyebabkan beliau hanya memiliki minggu pertama Mac untuk bertemu dengan Yang di-Pertuan Agong.

Suruhanjaya Pilihan Raya (SPR) menegaskan pihaknya akan mengambil masa sekurang-kurangnya empat minggu untuk mengadakan pilihan raya dan hanya SPR yang boleh menentukan tarikh untuk penamaan calon dan mengundi.

Pada kali ini seperti dijanjikan, tempoh berkempen akan berlangsung sekurang-kurangnya 10 hari dan beberapa laporan menyebut, ia mungkin dilanjutkan sehingga 14 hari terutamanya untuk menyelesaikan undi pos untuk rakyat Malaysia di luar negara dan pasukan keselamatan.

Beberapa pemimpin BN berkata Najib ingin mengelak untuk mengadakan pilihan raya pada 29 Mac hingga 4 April.

Ini kerana, kata mereka, tarikh tersebut jatuh pada cuti Good Friday (29 Mac) dan Easter (31 Mac) manakala Qing Ming (4 April).

Memandangkan 4 April jatuh pada hari Khamis, kebanyakan pengundi Cina memilih untuk membersihkan kubur nenek moyang mereka sepanjang hujung minggu iaitu 6 dan 7 April.

Kebanyakan kaum Cina pulang ke kampung halaman dan pilihan raya pada minggu tersebut mungkin tidak mendapat sambutan.

Hakcipta Terpelihara © 1995-2013 Star Publications (Malaysia) Bhd

Source:

[http://mstar.com.my/berita/cerita.asp?file=/2013/2/20/mstar\\_berita/20130220101550&sec=mstar\\_berita](http://mstar.com.my/berita/cerita.asp?file=/2013/2/20/mstar_berita/20130220101550&sec=mstar_berita)